

047 天尊說隨願往生罪福報對次說預修科文妙經 (敦煌本)

經名：天尊說隨願往生罪福報對次說預修科文妙經。撰人不詳，約出於南北朝或隋唐。一卷。《正統道藏》未收。《道藏缺經目錄》著錄。底本出處：敦煌 P.2868、龍谷 539、P.2433 號抄本^①。

(P.2868 抄本)

尔時天尊時遊十方世界，天上地下，无所不經。遊至大福唐國，見虛皇道君爲十方國土一切衆生，善男子善女人等，心生厭故，遂即分神變化，舉眉間一豪瓊光，遍照十方，无不明徹。尔時男女一切人等，及諸聖衆，晝夜惶懼，悲聲嘆泣，哽咽嚔慕，稽首合掌，叩

頭搏頰，肘行膝步。諸禽雜獸，普皆如是。一切衆生，諸方仰視，寂絕形影，莫知所尋。尔時虛皇道君慈愍衆生，飛身下界，安坐碧瑕神寶之座，念往衆生，如常說法，演法化人。一切衆等，及以禽獸，皆來投座，稽首作礼，步步而前，重過道君，慈愍衆生，珍重矜念。所以尔者，道君在座，演說欲說，重加慈念：汝等衆生，若有疑者，各自思惟，隨事問難，皆來諦聽，受我法教，所欲行者，濟死度生，聽我所說。

尔時座下有一真人，名曰普救，從衆中出，稽首作禮，上白天尊言：所有四輩弟子，若臨終之日，先爲亡者心願，往生十方快樂之國。作何功德，脩何戒行，作何方救，而得往生？

天尊告普救真人曰：汝能愍念四輩弟子，及有未來諸衆生等，聞此願生因緣之福。汝等弟子，諦聽善思，吾今爲汝而重說之。汝等男女，各厲本心，而聽我言。

天尊告普救真人曰：若有四輩弟子，若臨終之時，及未終者，願生東方

華林境界者，其有^②真人，名曰靜境無極之國，慧靜莊嚴。若臨□□□□□□□□隨願往生。

□□□□□□□□□□善男子善女人等，(P.2868 寫本止於此。下缺)

(龍谷大學藏本 539。前缺)

天尊重告太上道君曰：若有善男子善女人等，終亡之人在生之時，多有過患，及有債負，并諸怨結，恚恨煩怨，用三寶財物，或爲男女，又爲鄉閭，或爲朋友，亦爲己身，昌狂重造，不生畏懼。諸如等罪，難可陳說。汝等過去亡者男女，及以見存因緣眷屬，爲其亡人臨終之後，一七二七三七，乃至七七日内，即造繒幡廿一口，青黃碧綠各長七尺，於家宅中建立道場，請諸尊象，并諸幡盖，及以法師。見在男女，香火知識，齊同勸助，爲此亡人，多少任力，重造經象，及以布施出家法身，三日三夜，或七日七夜，轉經行道。遠近親屬，率厲相就，同至道場，各厲本心，爲其亡者，皆乞歡喜。一切男女，内外親

情，傍及徒衆，爲其亡者救拔苦厄，各發慈心，重乞歡情，莫生計念。當爲亡人，雖造片福，計罪補過，得減少多。遠近內外，諸善知識，若有一人，生此計念，縱爲亡者抄經寫象救拔，終不免難，生人怨恨，亡者重入地獄，受諸苦惱，无有出期。見存男女，各各減已布施，爲此過往亡人，重請法師，當道場內，各自稱名，踴猛精進，并乞歡情。若不重恨，爲其亡人造諸功德，供辦香油，然燈續明^④，轉經行道，亡者即得捨離地獄，而上天堂。諸是男女，臨終之後，七七之內，定其罪名，百日之中，配入五道，所欲造諸功德者。尔時普救真人不曉次第，重白天尊，願爲說之。見在衆生，稽首奉行。

尔時天尊告普救真人曰：汝等諦聽。一切衆生從初終之後，一七二七三七之內，造諸^①功德者，最爲上法。七七之內，造諸功德者，此爲次法。百日之內，造諸功德者，此名爲下法。七七、百日，造諸功德次第法者，汝等諦聽。第一造象，第二造經，第三造齋

戒，第四造幡華，第五造然燈，第六脩道場，第七贖生命，第八持布施，第九廣救濟，第十持慳心，第十一慈悲捨，第十二平等心。

尔時天尊重告道君、普救真人曰：爲過去亡者，能行此十二脩福，及諸功德者，名曰具足脩福，亦名曰慈孝之輩。所有男女，備脩前福具足者，一切亡人定獲快樂。若不如此，臨終之人必當墮落三塗地獄。若未終之者，身抱諸患，痼疾難除。能脩此者，滅罪万劫。福德具足。行此十二脩福，而上天堂，計功補過^⑤，豪分不失。所以尔者，昔有俗人，將一米投厨，乃得无殃數報，童子獻土，變成珠沙。罪福之輩，藏顯亦難。譬如淨鏡，照人形面，青白隨身，更无異見。汝等弟子，及諸男女，若有衆生聽吾此法，懃心聽受，慈悲柔弱，恒如持戒，勿作高心。父母之恩，昊天罔極，各自養子，始察己身。若未養子，如似醉人惛惛度日，其罪更深，存亡俱損，地獄之咎，難可出頭。汝等男女，各慎己身，受罪之時，走避

無處，身在地獄，苦痛自當，善惡業別，無人浪受。今告汝等，各自慎之。

尔時天尊告道君曰：一切衆生，生之時，爲終亡之人，七七百日，乃至長年，造諸經象，并貨諸物，施來入齋，造供極多，成功微少。或有殘供，浪費諸食，薰辛酒肉，通同共食，不生畏懼，三分支一，或造經象，亦復如是。名聲雖有，計福全无，一施一惜，或休或作。以是義故，右曰^⑥名聲功德也。譬如女人，裁諸衣服，裁截雖了，竟久不縫，必欲人着在身，從何慣帶。譬造經象，以衣相喻。若造經象齋食，施與法師等物，一分失洛^⑦，隱沒差殊，其福不成，何勞須造，徒費尔功，財貨浪費，存亡罪重，轉更加深，終无片益。如此衆等，作何方計，而得利益亡人，脩何功德，而得拔脫亡者，滅罪除愆。尔時道君曰：衆等愚癡，不自曉了，惟願天尊重爲說之。一切衆等，叩頭作礼，稽首奉行。

尔時天尊告太上道君曰：善哉善哉，如卿所言，護持世戒，能爲衆生，方

便問難，諮請諸疑，隨意科數，一一具問，實所希有。我今重嘆，不可思議，告諸衆生諦聽之。

次說衆生用三寶常住等物報對品

天尊曰：一切衆生，減削造經及象，并齋食施物等，私將入己用者，若是象物直一錢以上，十年十倍，又復不還者，身當重病，失於相好，鳥栖露宿，棄於人間，永无出期，縱得人身，聾盲六疾，恒不具足。若用經幡物者，七年七倍，又不還者，身當囚徒，在於囹圄，身着枷鎖，縱得人身，失於相好，不及人次，欲出无缘，終身破壞。若用齋食物者，六年六倍，又復不還者，身為餓鬼，頸似布綻，腹如懸鼓，身負鐵輪，火徹左右，或作衣着，身如火山，若作飲食，變為膿血，若作鞋履，化為杻械，耶病在床，身體臭爛，人不用見，逕年累月，骨盡筋消，終成失好，一入地獄，難出生天。若用布施法師物者，五年五倍，又復不還，身為貧賤窮寒，衣食乏少，或為牛馬，以力報酬，或作猪羊，雜獸之屬，以命相求，或作四夷，不知善

惡，或逢惡知識，衆橫湊身，萬劫无解，縱生在人中，聾盲六疾，失於相好，不及人次，一切眷屬，悉皆棄之，或作夫妻，中道離別，有孤男女，倚恃傍親，或患病疾，无人侍養，或加困篤，發語先悲，縱發孝心，依附无處。如此等罪，實可悲哉。今告女男，耳聞眼見，實可悲傷。忽若身遭，如何當處，如此等罪，實可重悲。告諸衆等，珍重殷懃，念念用心，勿生豪強，一生脩福，猶不足身，況造罪根，晝夜無數，有財強健，意氣陵天，受罪飢寒，藏身无處。計斯十惡，亦猶本心，煞害衆生，為他人故，當時作樂，快不可勝，債命酬怨，惟汝獨自在生受罪，憑伏親緣，死入三塗，遣誰救拔，斯楚痛，切骨傷心。若入三塗，悔之何及，地獄受罪，數種役身，縱欲說之，亦難可盡。是諸男女，各自思惟，四大假身，破壞立至。告諸男女，努力慎之。

尔時道君從座而起，五體投地，長跪叉手，上白天尊言：若有善男子善女人等，後生至死，或毀壞尊象，剔破

道場，或剥脫淨行人，出家之衆，或破諸禁戒，及五逆不孝，或傳口合舌，謗說出家人，或說道三寶，謬聲曾祖，怒氣耶孃，或角眼斜眉，愛夫憐婦，或造立私物，親於妻子，疏隔耶孃，或姊妹弟兄，看如陌路，或用三寶物，无有愧心，負債彌多，舐蔓不与，或煞生偷盜，兩舌吱咽，或罵詈他人，耶姪穢濁，恒常惡口，音毒在心。諸如此罪，說亦叵周，衆等愚癡，實不能決。惟願天尊，哀愍衆等，重請罪福，而為說之。（龍谷大學藏本539止於此。）

（P.2433 抄本）

次說罪福報對品

天尊答道君曰：卿之所問，无不遍周。此等衆生，在生受罪，猶未得除，死入三塗，次第而受。汝等男女，各自諦聽，報對之中，次第而說。鐵床銅柱，焦筋碎骨，以報耶孃之罪。寒冰雪山，分烈形體，以報劫盜之愆。吞火拔舌，融銅灌口，以報舌端之咎。塘煨埋體，熅火燒身，劍樹撞心，以報煞生

食肉飲酒之罪。鐵犁耕背，惡鳥啄睛，碓擣磴磨，以報斜眉角眼之罪。身爲餓鬼，脩歷溲湯，燒鐵爲丸，充飢當食，以報破齋違戒之罪。眉鬚墮落，遍體生瘡，舉身洪爛，以報破壞經象道場之罪。口中出火，眼裏生瘡，遍體膿流，藏身无地，以報剥脫出家人之罪。舌不得語，永啞喉中，盲目亡精，口脣橫烈，以報說道出家人父母之罪。癡聾少短，生死不分，或作夫妻，中道離別，以報疏隔耶孃譁聲之罪。或爲牛馬，或作猪羊，鳥獸犬鷹，以報舐債之罪。或爲人僕使，後母前翁，或作孤兒，婦人難產，或貧窮饑餓，長病在床，以報五逆賤薄兄弟姊妹之罪。諸餘等罪，皆在人身，不及遠親，任茲近視。汝等男女，善自思惟，報對逼身，實難忍受。告諸男女，脩福立功，預造善緣，當得解脫。

尔時太上道君從座而起，稽首作禮，上白天尊曰：一切衆生在生之時，堅貪^①恠惜，積聚財錢，競作有爲，不能割捨，延時引日，造罪弥輪，凡偈愚癡，

惛惛度日，心恒惡想，不解預脩，縱作善因，失於次第。天尊慈愍，重示男女預脩之因。尔時男女叩頭稽首，依法奉行。

次說見存預脩科文品下

天尊告太上道君曰：若有善男子善女人等，一爲天地，二爲帝王，三爲父母，四爲衆生，五爲血屬，六爲己身。諸是男女，初出父母胞胎以後，至一歲、一十、廿卅五十，乃至百歲，百廿歲，必欲^①預脩，還從一七、二七、三七、乃至五七、七七、百日，周而復始，乃至永年，所造功德，還依次第而作，第一造象，第二造經，次即造卅九尺長幡，設卅九人齋食，安置道場，請諸尊象，并及法師，香火知識，然燈卅九支，任力更多，燈如車輪，三日三夜，或七日七夜，披心懺悔，盡心布施，稱揚三寶，各自首罪，不得藏隱。一懺已後，改往脩來，精進齋戒，迴心贖生卅九命，或百或千，任力更多，施及悲田，貧窮下賤，不具足衆生，產婦餓苟^①，病人孤老，囚徒餓鬼，救死度生不仁之者，勸

成善因。他方遠客有急，投人而爲開度，濟其厄難，施及衣食，悉令具足。重更發心，慈孝父母，當爲寫象，抄靈寶經，救拔三塗五苦，出家功德，父母報恩，隨願往生。卅六部經內，任力寫之。如此人等，各寫一通十通百通，千億萬通，无極數通。及諸幡象齋戒，亦復如是。若然十燈百燈，千燈萬燈，无極數燈，亦復如是。

尔時道君上白天尊曰：今見細細微塵，无億之數，寧爲多不。天尊曰：甚多甚多。道君曰：今將此經象幡燈，贖生散施功德等，寧爲多不。天尊曰：甚多甚多。道君曰：今將細塵劫數，辟於此經象幡燈等功德，亦如塵沙，數之不得，甚多甚多，不可稱量。如此功德，最爲第一。其經象幡等造訖，建立道場，七日七夜，吟咏讚嘆，誦經解結，令一切怨讎，悉皆解脫，及以眷屬，遠近皆來，同至道場，同乞懺悔，勿生計念，布施懺悔，罪可除滅，七祖父母，出離地獄，而上天堂。告汝男女，脩齋禮拜，受戒持心，忍辱柔弱，供

養三寶，及出家人，斷諸酒肉，燒香燈燭贖生，救拔一切等命，皆譬我身，更无別異，汝之男女，依法脩行。

天尊言曰：我過去後，當爲一切存亡衆生，遺諸經戒，種種功德，皆有次第。若有衆生，得吾此經者，香湯灑地，及身沐浴，著鮮潔淨衣，燒香燈燭，幡華寶蓋，周匝圍遶，禮拜供養，懽喜踴躍，長跪叉手，護淨精進，受行讀誦，堅持遵奉。爲諸人等，未聞之者，皆悉遣聞。

天尊言曰：汝等善男子善女人，若將黃金，如崑崙山大，遍滿天地，而將布施，其功雖大，猶復不如方便教人，一句一偈。經言永爲身寶，黃金雖貴，不寶我身。此經雖微，生死因果，汝等男女，勿生癡故，恠此黃金，竟久惜金，不貨脩功，與身爲患，必无利益，即是煩惱枷鎖，不出火坑。

天尊曰：若能周匝作此功德者，見世過去一切宿罪，悉皆除滅，見存過去所在之處，逍遙快樂，上界生長，童子出家，供養三寶，如斯功德，不可思

議。時諸衆等，既聞經已，稽首作禮，稱善奉行。

天尊言曰：若有衆生，得吾此經，生不相信，若不護淨，心生不信，誹謗此經者，及口氣不淨，心粗意高，惡口罵詈，交頭亂語，心生我慢，毀滅經象，幡華燈燭，法衣齋食，絞亂道場，輕師欺法，五逆不孝者，當當^①來世眉鬚墮落，遍體生瘡，舉身洪爛，長淪地獄。若說出家人者，舌根永爛，一日之內，万死万生，縱得人身，□□□具，終日破壞，長病在床，或作六畜鳥獸之屬，命力相讎，百病湊身，聾盲六疾，惡風瘡癬，沉淪地獄，生男五逆，生女啞啞，破壞經象，說出家人，五逆不孝，陵虐貧賤，地獄□□□最深，桎械枷鎖，禁繫罪人，斬斫糜碎，聚骨成人，巡歷地獄，解脫无因，千罪萬惱，都猶汝身。告諸男女，各慎己身。

尔時道君上白天尊曰：若善男子善女人等，既聞經已，受行讀誦，堅持護淨，燒香然燈，安坐念道。心无暫妄，不生懈怠，懽喜踴躍，長齋受戒，持

心忍辱，行檀布施，供養出家人，救生度死，濟拔一切，平等慈心，不敢重造，各屬本心，捨惡脩善，慈孝贖生，憐貧愛老，□□□□□□□□當，幡華燈燭，稱力供養，六長月十，脩□□□，道心增長，永斷酒肉，卑心念善，斷諸煩惱，恒遇道場，常聞鍾磬，讚詠讀誦，永斷□□，見存快樂，死者往生，求男得男，□□□□□□□□□□處安樂，皆□□□時說

(P. 2433 止於此，下文缺)

① 案敦煌 P. 2368 號寫本卷首完好，卷尾殘缺，卷首有標題：『天尊說隨願往生罪福報對次脩科文妙經一卷』。龍谷大學藏 539 號寫本及 P. 2433 寫本，均首尾殘缺，無標題。據其內容及字迹，可知兩件原爲同一抄本，且與 P. 2368 抄本有關。詳見大淵忍爾《敦煌道經目錄編》考訂。本篇錄文中，已將原卷中某些俗寫異體字改作通行繁體字，不復詳出校記。

② 其有：原作『其有有』，刪一『有』字。

③ 續明：原作『續明』，據文義改。

④ 造諸：原作『造諸諸』，刪一『諸』字。

⑤ 補過：原作『捕過』，據文義改。

⑥ 右曰：疑當作『名曰』。

⑦ 失落：當作『失落』。

⑧ 猪羊：原作「猪羊」，據文義改。

⑨ 堅食：當作「慳食」。

⑩ 必欲：原作「必欲欲」，刪一「欲」字。

⑪ 餓苟：當作「餓狗」。

⑫ 當當：應作「當於」。

(王卡點校)